

Judi: Husam sifatkan Vincent Tan gagah dari PM
Malaysiakini.com
July 02, 2010

Ahli jawatankuasa PAS pusat, Datuk Husam Musa menyifatkan ahli perniagaan, Tan Sri Vincent Tan lebih gagah dan berani dari Perdana Menteri, Datuk Seri Najib Razak yang menyatakan beliau memang mendapat surat untuk melaksanakan perjudian bola sepak daripada kementerian kewangan.

Menurut Husam, Tan dalam pertemuannya dengan penganalisis perniagaan 29 Jun lalu menunjukkan surat kelulusan asal yang diterimanya yang bertarikh 13 Januari.

"Dalam perjumpaan itu, Vincent Tan tunjukkan surat kelulusan asal bertarikh 13 Januari tahun ini. Vincent Tan masih menekankan kerajaan Najib telahpun memberikan kelulusan bertulis. Enam bulan kemudian, kerana desakan bertubi-tubi, barulah kelulusan itu ditarik balik.

"Syabas Vincent Tan! Lulus kata lulus," kata Husam dalam blognya hari ini.

Katanya, ternyata Tan tidak memperdulikan reaksi Umno dan berani mendedahkan apa yang sebenarnya berlaku.

"Dia dedahkan keadaan sebenar. Ini baru betul-betul raja judi. Umno terkebil-kebil dengan tindakan berani Vincent Tan. Tak ada siapa berani tegur," katanya.

Namun begitu, kata Husam (kanan), nasib baik ada rakyat yang menyedari perkara berkenaan dan mengadakan gerakan politik yang bersepadu.

"DAP yang memberikan ukuran moral yang memalukan Umno. Ada Umno Johor (atas pengaruh Muhyidin atau takut kalah pilihan raya?) turut sama akhirnya menolak kelulusan ini.

"Umno Kelantan dan Terengganu tak seberani Umno Johor. Kelu membisu," kata Husam.

Menurut exco kerajaan Kelantan itu, pagi sebelum Tan menemui para penganalisis industri perjudian, beliau melalui syarikatnya Berjaya Corporation mengeluarkan kenyataan bertulis menyatakan kesal yang amat sangat di atas pembatalan itu.

Katanya, dalam kenyataan bertulis itu, disebut bahawa 'pembatalan itu dibuat selepas sebelum ini kementerian kewangan telah meluluskan semula lesennya' - dan ayat berkenaan digaris untuk memberikan penekanan.

"Maknanya, Vincent Tan bercakap benar dan beliau mahu buktikan beliau bercakap benar. Ada orang lain bercakap tidak benar," kata Husam.

Pada pertemuan itu juga, menurut Husam, Tan yakin pelan perjudiannya akan diperbahurui semula pada masa akan datang.

"Bila? Selepas pilihanraya umum nanti? Selepas Pakatan Rakyat tak kuat?" soal Husam.

Beliau berkata, Tan (kiri) secara terang-terang menyalahkan Pakatan Rakyat atas pembatalan lesen judi sukan itu.

"Dia tak salahkan mufti-mufti atau Utusan Malaysia atau PERKASA. Menarik juga," katanya.

"Apa yang Vincent Tan nak kata, kalau BN menang besar pilihanraya akan datang, hidup semulalah lesen judi bola beliau," perlinya.

Menurut Husam, dalam perjumpaan yang sama, didedahkan bahawa kerajaan pernah membayar ganti rugi kepada Berjaya Corp atas pembatalan lesen yang telah mereka perolehi sebelum itu.

Pembatalan itu dibuat pada 1990 semasa Datuk Seri Anwar Ibrahim adalah menteri kewangan sehingga membolehkan Berjaya Corp mendapat ganti rugi sebanyak RM18.9 juta.

"Beliau nak kata, kali ini, Berjaya Corp akan dapat ganti rugi sekali lagi kerana menteri kewangan memang dah bagi kelulusan.

"Vincent Tan nampaknya bukan sahaja kaya, tetapi pemimpin Umno, tak ada yang dia segan atau takut...." kata Husam.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/136261>